

四庫全書

集部

欽定四庫全書

盱江集卷三十一

宋 李覲 撰

墓碑

陳府君夫人聶氏墓誌銘

并序

府君諱某字某世籍南城曾王父某王父某父某皆不仕予六七歲時在山中有人從外氏所來言從母之夫病且死其弟以股肉食不起既而事寡嫂有禮族姻善之及予長審知其人乃府君也景祐三年秋八月府君

年五十三卒其冬十二月葬可封鄉安樂里源潭之陽
後十八年至和甲午夏四月夫人聶氏年七十四卒明
年春某月葬于其墓東南隅孤來求銘敢不聽吾邑陳
氏為富家而幅之以善于今四五世智不以駕愚力不
以鉏弱官無訟牒獄無繫人入塲屋得祿位者磊磊相
望而府君以孝悌處其間喻子教孫蚤聞暮燕以終其
身不亦美哉夫人之曾祖某祖某父某亦不仕為人母
者五十年主家事者三十年旁禮娣如下法子婦儉故

不乏用慈故不失恩屬纊之日門內百口又何盛也生
八男執喪者五人曰某其人和能友羣弟曰某善讀經
書作詞賦郡薦新人嘗為之首曰某曰某曰某服產業
一女嫁黃氏遜之子曰陟進士及第初為邵武尉銘曰
管仲有言倉廩實知禮節衣食足知榮辱今之愚者
階其富以趨犴獄陳氏之良鄉所矚君之夫婦全而
復積善有慶兮後昆百祿

進士傅君墓表

亡友傅君代言字某生同鄉長同學心純行潔而外不
亢激見人善卑之若臣僕聞人過弗敢言其在已則改
不待頃故在家而和與衆無蒂芥好學有辭以進士得
試於墀下兩舉不利歸而寢疾以書請覲願一言庶乎
不泯沒病革矣書字幾不成猶拳拳俟報而後死哀哉
其意何邪時年四十五慶厯甲申秋七月也後二年正
月葬君家世善良曾祖某祖某未嘗筮仕父某在祥符
以前用辭賦著稱不遇而死皆曰在後人至君又無祿

識者益憐之娶鄧氏生二男某然未有立葬已其兄
某使人來告廼表其墓曰

莊周論天曰自然吾以為妄言至于仁者天鄙者壽
禍福之來荒忽而不可究然後知周之言為不謬嗚
呼吾友不幸而堂有老室有幼不然則大彭殤子亦
何足道哉

陳伯英墓表

吾嘗銘陳君仲溫之葬以行高故譜叙甚詳其子漢公

字伯英

初名詠

後十二年而死又從而表之噫逝者如斯

徒使吾文不施於樂歌舞蹈而施於墟墓間也伯英少從吾游俊健有智數頗多能應進士舉不售因放失繩墨衆非之終克自反於親勤於家儉於人恭摩垢出光清議始變年四十得疾不治哀哉妻聶氏有五男其三嚮成人曰汝羲汝士汝臣女許嫁鄧潤甫廖庭圭幼者二人其弟次公次山皆有學行庶幾大其門噫天人果通邪善積必有慶不然未可知辭曰

山可塵谷可堙謂余非妄人者無襲伯英之墳

處士饒君墓表

饒君諱某字彭年世占南城蓋予同鄉曾祖某祖某父某皆不仕君耦周氏生男景先見先女嫁陳某李某吳某桂某其齒六十有四死葬里中之金灣後一年實慶歷七年景先礱石以待我故書其墓曰

吾邑絕大江數百里與閩粵為腹背土地行沃宜稻桑麻無大水旱飛蝗所不至故其人足衣食俗推少

機不肄文法為獄訟事吏惡政苛鑒之百端卒無敢
言以豐富之資加自重惜而居之名山水之間花草
禽魚日變時異使人見之心竅恢恢欲追騷人校江
山醜好然則諸父兄行有不為祿仕而搏禮義探儒
雅者固其宜彭年性溫厚力治生以遠不足其餘唯
務為詩與學者更唱和爭錙銖疊疊不倦二子幼讀
書不使然外事故景先以其文再試於禮部見先亦
嗜學多藝其壻陳吳桂皆應進士舉由此觀之抑好

善之效晚節自除葬地築室其旁以待賓客為觀遊
歌琴賦酒不覺老至自囂塵處聞其所為有足喜者
往時相見領髮未素今茲復來墓草已宿弔傷雲霞
嗟嘆栢竹揭之墓門千載可讀

醫博士周君墓表

周君諱某字某鼎州桃源人以醫來建昌為博士年七
十有一皇祐二年夏六月卒冬十有一月葬其孤播總
來求表之辭曰

君之至是邦吾時未生及吾成人與之往還尚二十餘年其容體昂昂口辯多所踴履凡荆楚間山川物象屈原宋玉嘗稱道者往往記憶上下巫峽見神女事迹言之鏗鏘可聽善飲酒要之坐花草醉倒歌舞不以年長辭趣為和同然未始以氣下於物用醫藥交有位雖甚親比亦無所私謁吾以此知其人吾母曾病急不能言衆醫縮頸遁去唯君視之曰不死治數日起之吾以此知其藝命不謂短家不謂貧其教

有義其嗣有人龍池之東負山為墳後來弗知信在斯文

前進士廖君墓表

君諱夷清字禮卿南劍州將樂縣人曾祖居素仕南唐以剛直見忌由校書郎二十年裁得大理司直建隆而後稟命我朝遂課其功累遷至瓊林光慶使檢校太保判三司驟諫後主不聽閉門却食服朝衣冠立死井中已而得大手書於篋曰吾不忍見國破耳故文士徐鉉

弔之有三閭自投於澠浦伍相願棄於江流之句不數月而金陵降迄今鄉人有記其事者皆叩頭稱之祖仲符少有志氣以詞學名兄弟蔭補獨不就及朝廷錄忠臣後授汀州掾卒父知章亦秀士克世其家未及進而死君童子而孤力自樹立篤學有才作詩賦尚俊壯其於啓事長調歌尤能動人性孝友常省其姑退必感泣謂人曰吾姑類先人其弟臣清得官而天遺骸在唐州君時下第至江南聞之匍匐往收方大饑道遇刼告以

其故賊亦義之不害初舉解頭好事者寫其賦於屏今
猶未絕五試禮部皆不偶慶歷二年特奏名賜同三禮
出身未免選沒於京師年四十八昭武李誥帥其友舊
棺斂以歸其冬十二月葬于建昌軍南城縣太平鄉涓
水賈君之徙居邑也娶鄧氏生四男平噩可至一女嫁
周翰夫人之死後君十三年於其葬也平自為誌平十
二齡而無父嶄嶄自然出於泥滓間以濟其業聽高眠
遠有足嘉者羣弟壹於學問皆未易知積善之慶將在

是哉以石表未立捧其鄉先生屯田郎中李公之狀來
觀嘗辱君游謹撮其要託辭左方曰

太保之忠貫神炙天當時不省其諫後世不聞其賢
非君之才而平之孝孰能因而傳乎為人之子孫者
其可不然乎

李子高墓表

南城縣東北遠百里吾高祖之父家焉天聖中嘗省松
栢至於子高之室子高業已不仕有男冠卿生十三年

習為歌詩教義諄諄無忝世儒後冠鄉第進士試校秘書守臨川主簿代歸未幾而孤來乞文曰惟先父好學篤善應舉不得官治衣食業不能貪以取餘醉吟山水間忘其老憲彝人之急里有爭往往和解之使不致獄訟衆亦愛悅用濟不肖子于官學未始有報而舍去忽焉願得表其墳託以不腐姑取其譜而系之辭子高諱喬年六十八慶歷四年四月庚子卒十一月乙酉葬考彥機祖文遇曾祖捷皆布衣初娶盧氏生叔平叔良早

死一女嫁饒贍繼陳氏生冠卿其季漢卿辭曰

生無失宜死何足悲有子而奇其後焉可知邪

先夫人墓誌

有宋皇祐三年冬十有二月乙酉李氏之孤覲奉其母
夫人樞葬于所居西先父府君墓東南隅實建昌軍南
城縣鳳凰山之麓也夫人姓鄭氏其先蓋鄉大姓曾祖
某祖某考某皆不仕夫人初有二男為無服殤既而生
覲十四年而先君沒是時家破貧甚屏居山中去城百

里水田裁二三畝其餘高陸故常不食者夫人剛正有
計算募僮客燒薙耕耨與同其利晝閱農事夜治女功
斥賣所作以佐財用蠶月蓋未嘗寢勤苦竭盡以免凍
餒而覲也得出游求師友不為家事固其心用卒業為
成人不然最爾小子為傭保為負販供養猶不足何暇
孳孳學問間邪復還舊居娶婦有孫如平人家夫人滋
不倦門內細碎覲尚未及知慶歷中應科目罷歸迺自
念親老矣而數棄去舟江湖客京國以為之憂抑又窮

空無以備甘脆非人子所宜因決不求仕進忍恥業衣
食庶乎終養無有憾焉既八九年而智淺力少不克如
志夫人性多設施好義而信人祭祀賓客婚姻之禮不
以貧故累之聞人緩急來有求者應之唯恐不逮衣服
在身者必假飲食在前者必輟況於錢穀固無吝心由
此困乏百計不效夫人亦厭之覲惟易窮則變變則通
所識公卿大夫多矣苟扶吾親往乞食焉尚可以濟廼
用此言告之夫人喜曰是吾心也幸而離鄉非但謀食

而已且使雜人不到吾目前則煩惱自少況汝幼學已而不進吾與汝俱西亦將有知汝者吾孫又漸長彼多英俊游聞見當遠大也謀之未集而及大故疾病猶數數問行期嗚呼夫人卒在塋前二百七旬有八日實其年春二月丁未壽六十有九後先君沒二十九年先君嘗學不應舉以教其子作詩賦亦樂施惠尤直信生平無所爭不識州縣廷終以不得意死年四十三嗚呼覲何人哉有心不明有力不彊父已不待養天幸有母而

方施施進不能為祿仕退不能求財利以足其欲使之
顯頓晚迺悔之未及行而禍作矣嗚呼覲何人哉天鬼
不誅王法不治猶有面目以視息世間復何人哉誠懼
乏祀不自引決敢因襄事刻石以記其罪抑為事親者
戒嗚呼哀哉

亡室墓誌

亡室陳氏不知其先所自來今為南城人曾祖某祖某
世大姓父某弱冠夫婦同時死唯是女生五竿養于伯

父某又十一年而嫁嫁十七年而卒於戲吾家破久及
親好自樹立與世不諧日益危窮陳氏處之罔不寧雖
晨夕費猶或已出斤粧櫛賣之單盡執勞辱殆與臧獲
等時復寒饑不可忍終無一言族親期會惡衣以往叅
錦文珠象之間而不耻事姑瞻相顏色惟先意之為吾
母固愛之靚行四方未嘗與謀亦不敢問在家有所嗇
獨居常數月然不見怨望卑柔靜正亡世俗婦女之態
訖不得報以死悲哉長女許嫁陳某一男參魯僅毀齒

中女五歲其少未免懷姑老喪婦子幼失母號咷之聲
簪耳酸骨校善惡則尤人論禍福則怨天復何言邪龜
告吉日用葬於城東二十有五里望州嶺之陰且刻石
以識其墓于時歲在丁亥大宋慶厯七年

亡女墓銘

李觀之長女嫁為陳汝翼妻年二十六死其父傷之不
能已乃銘于墓曰

巧以慧兮慎言語

之汝家兮畏如鼠

人生皆樂汝獨苦

命之薄兮抑吾故

汝來何為何以去

墓無子孫久誰護

後人知汝吾之女

幸掩汝骨無汝露

鄧公儀傷辭并序

亡友公儀名立姓鄧氏舉進士年三十二以死嗚呼公
儀生數歲秀異不羣諸兒善記誦聞於鄉長而學成為
文辭謹聲律主故實讀之溫溫可愛性賢深於事理其
道雖不著之策牘為訓具顧其身所履頗多矣事父母

孝謹撫其弟愛而有法廉不至狷儉不至菲氣堅正服義疾惡人不得已而與居未嘗安若據棘芒也厭浮屠說斥巫祝邪媚遠之不使汙其門其意正與予同然予時有所避閉不出諸口公儀見事如不可忍雖在親戚多引繩墨彈直故予猶憚之也早苦氣逆藥之且平俄而執父喪哀甚疾作不可治矣是以死嗚呼予自始學善之志合道一居甚驩衆不是吾行而公儀是之衆不聽吾言而公儀聽之樂未始不與共也憂未始不與謀

也他雖甚厚弗之若也寃哉失之矣復何言也公儀死
前百餘日予將西游告之別時公儀病矣猶未知果至
是也姑勉焉而去及其歸也而公儀葬矣不見其死友
之不終也不銘其美文之不公也吁墓之草再黃矣是
皆弗可得而悔也徒傷之以辭云

落落其實兮韡韡其華晰晰其鄉兮噤噤其家出處
默語兮禮而弗邪璞乎君子兮孰些言其瑕學優而仕
兮維人之欲自巖而坦兮始園其轂志愈張兮疾愈

戲老愛弱慕兮嗷嗷其哭嗚呼豈人不好善兮鬼之
求不用于明兮用于幽不然何時未之知而命奪之
善不獲福兮惟禍之隨已焉哉鳥之飛兮隹其翼航
之中流兮槩斯溺吾友之舍我兮不我力行煢煢兮
將焉得自我不見兮再易其正心煩憂兮曷月而寧
桂而酒兮以寫我誠路漫漫兮莫造其塋莊周之云
兮息以死而勞以生斯言之信兮子無恨情吾道之
不病兮吾文之行千秋之下兮庶存子名

白石暹師塔銘

并序

佛法之行於中國豈不雄健不校矣哉天之生民靡不
有事賢者效志愚者效力以有賢亡孳孳蚤夜而鮮能
得志唯佛之徒去離遠甚安樂無筭王臣所嫗覆士女
所合湊生則得其奉沒則得其歸而況人材有以超類
者惟其心之所之而已噫佛之法豈不雄健不校矣哉
今吾見惠暹師其人材超類者乎師南豐章氏子生十
三年出家禮白石居壺長老誦法華經祥符中以恩得

度壺既化去其住者惠通惠德而師繼焉師有計慮能
施為自通德住時已主院事殆今無曠性潔特恥交凡
俗積四十年不踐城市頗憲篇籍詠古人詩以對賓客
吾少居山中嘗與往來慶厯五年復抵其居因告我以
年老治送終之具院西有官隙地且買之以歸骨焉懼
久淪滅無以旌識幸我之來請文以信之吾既善師之
行又歎佛之徒能優游以卒也如此廼授之銘曰

生也何來 死也何歸 神形一離 曷封樹為

土石莪莪 松櫟差差 惟門弟子 是瞻是依

盱江集卷三十一

欽定四庫全書

盱江集卷三十二

宋 李覲 撰

常語上

或曰仲尼之徒無道桓文之事者吾子何為曰衣裳之
會十有一春秋也非仲尼脩乎木瓜衛風也非仲尼刪
乎正而不譎魯論語也非仲尼言乎仲尼亟言之其徒
雖不道無歎也嗚呼霸者豈易與哉使齊桓能有終管
仲能不侈則文王太公何憊焉詩曰采芣采菲無以下

體蓋聖人之意也

或問伊尹廢太甲有諸曰是何言歟君何可廢也古者君薨百官總已以聽於冢宰三年成湯既沒二十五月中伊尹之知政太甲之居憂固其常也不宮於亳而宮於桐近先王墓使其思念名之曰放儆之至也故三祀十有二月朔伊尹以冕服奉嗣王歸于亳二十六月而即吉也則太甲之為君何嘗一日廢矣哉

或曰然則霍光廢昌邑王非歟曰霍光之罪滅族晚矣

知之不明行之不慎視君如玩物去取在諸掌董卓效之東京桓溫用之江左宋齊以下覆車方軌職光之罪也敢問為光者宜如何曰皇曾孫高材好學而光不知王賀放從而光不察既委質而臣事之矣庸可悔乎衛靈公之無道也有仲叔圉祝鮀王孫賈而不亡昌邑羣臣有王吉龔遂忠直人也吉諫遊獵而賀加禮遂捽大奴善屬衛士長行法而賀不禁賀之資朴猶可為也況大將軍秉天下權其讒諛者舉放逐之如吉遂者使居

左右若夫漢廷固多士矣豈無輔弼之益哉受皇帝璽綬三十七日而解之何其暴也賀之言曰天子有爭臣七人雖無道不失天下光而學也慙恨死矣

或曰伊尹放太甲而天下厭然周公屏成王而國有流言何也曰周公武王弟也有次立之勢管蔡其至親也易以生怨以怨濟疑理固然也敢問太甲不能終允德成王不見金縢之書則伊周奈何曰太甲賢也不得不改成王亦賢也不得不悟太甲成王果不賢耶則湯武

不以託伊周伊周亦不受之於湯武

或曰知人蓋未易也周公不知管蔡安知成王曰事有小有大有緩有急監武庚之國其任人也常事也天下之政多矣譬諸日月猶有所不照夫以新造之周而謀嗣焉其用心奚若堯不知四凶可也至于丹朱其有不知者乎

徐羨之傳亮謝晦廢宋少帝立文帝亮迎大駕於江陵道路賦詩有悔懼之辭已而果誅夫三子者有功於文

也何疾之為曰疾之必也由其悲號嗚咽而後悔懼亮見事遲耳女之賊其夫而私於我者其可以納之室乎是亦將賊我也宋文豈不謀其身不爾則為後嗣也漢宣帝始立謁見高廟大將軍光驂乘上內嚴憚之若有芒刺在背故曰威震主者不畜霍氏之禍萌於驂乘也成濟刺殺高貴鄉公司馬文王聞之自投於地乃收濟家屬付廷尉夫弑逆非文王意耶曰弑逆之名何可當也有其意者必假手於人而歸罪焉養犬者固欲其禦

人也客來而傷則擊犬慙於客不得不有說也為大惡而得大利既外於人倫矣況父母妻子狼籍都市者乎智矣哉王僧辯也其對湘東王曰平賊之謀臣為已任成濟之事請別舉人

孰謂漢孝文恭儉而已乎其有帝王之材者也知權者也周勃誅諸呂迎立之即日入未央宮夜拜宋昌為衛將軍領南北軍張武為郎中令行殿中然後坐前殿勃之掌握已無物矣許勃歸相印既又使率列侯就國何

其決也或曰孝宣之初昌不然曰勢未可也宣為庶人
依許史而已不若文之有代資也漢廷諸臣未始相識
誰可與言哉既踰年矣而光稽首歸政不因此謝之顧
謙讓委任焉過也幸光連死不爾殆哉敢問光雖無術
其志忠矣抑可疑乎曰使光未死而陰妻之語泄則將
何為

權乎權君所以廢興國所以存亡戒之戒之一失之而
不可復也惟至明然後可以權與人惟至忠然後能以

權歸上敢問何謂也曰大權在已大禍隨之夫其用事
日久刑人之父殺人之兄紂削人之爵位者多矣言而
弗聽求而弗得者又多矣怨者幾人邪怒者幾人邪我
一日而去其權則彼無動邪譬諸騎虎下則死矣富貴
尚不足惜其如我身何其如我家何舍隆盛而就夷滅
人情之所難其附離者又欲尺寸功則斯人也能不異
慮邪魏武有言曰不得慕虛名而處實禍信矣其惟君
子無求生以害仁者斯可謂至忠也已矣

或曰古之至忠者誰歟曰其皇甫嵩朱雋乎平黃巾威震天下梁衍說之而不肯從陶謙推之而不肯應聞命馳走就拘朝廷其忠不可及也敢問不有郭子儀者乎曰子儀可人也然唐室雖衰人心未去程魚雖巧言肅代猶出命君命而違不反則叛矣反叛之名中人憚諸況子儀乎嵩雋則不然董卓李傕之猖狂獻帝雖在無獻帝矣因兵威乘衆欲以伐其罪孰不曰宜也彼以君命來遂不敢拒哀哉二臣之心吾嘗為之痛哭矣

或曰范曄評嵩雋以為舍格天之大業蹈匹夫之小諒
卒狼狽虎口為智士笑何如曰申生不敢愛其死使天
下知有父也嵩雋狼狽虎口使天下知有君也人以君
命召我我以矯詔拒之其非矯者亦足以為之辭矣夫
除君側之惡惡殛而君興可也不幸投鼠而器喪焉安
得面目見天下哉是二臣者所以自歸於陷穽也彼范
曄弑君賊也宜乎其笑之矣

盱江集卷三十二

欽定四庫全書

盱江集卷三十三

宋 李覲 撰

常語中

晉明之明王導之忠其至矣乎或曰元帝固任導矣曰
否王敦初反導不足疑也而元帝疑之王敦再舉導乃
可疑也而明帝不疑夫敦不以君為君其肯以導為君
導既宰相矣藉令敦捷又何求焉在他人猶可無異志
況導之為腹心乎而劉隗用事導見疎遠且欲悉誅王

氏當導之率昆弟子姪每旦詣臺待罪也呼周顗以百口累之而不應也傷哉唯恐其不免耳再舉則不然為導者蓋懲前事有不自安之心為明帝者蓋以前事疑之無委任之理而導詐哭欺使眾有奮志帝屬導節使都督諸軍君臣之間若合符契遂平大難以濟中興非至明至忠其孰能哉

或問閭續訟愍懷太子之枉皇太孫立復上疏焉夫以惠帝愚賈后賊安能聽言徒觸死耳續奚為哉曰上聽

言人誰不敢言佳哉續也是難能也豈一時之言萬世之言也惠帝雖愚萬世當不愚賈后雖賊萬世當無賊其言欲使著令諸有廢興倉卒東宮兵馬皆得輒嚴須錄詣殿前面受口詔然後為信聽其臣子得如邴吉距詔書周昌不遣王田叔孟舒隱親左右所以固儲副安後嗣誠哉人主有喜怒宮掖多女奴詐怒解而後悔詐行而後覺無及矣如續之言萬安計也嗚呼學者之忽也吾與士大夫接三十年矣未嘗有齒牙續者也漢高

帝使陳平乘馳傳載周勃代樊噲將曰平至軍中即斬
噲頭二人計曰樊噲帝之故人功多又吕后弟吕須夫
有親且貴帝以忿怒故欲斬之即怒後悔寧因而致上
令上自誅之噲受詔即載檻車詣長安至則高帝已崩
吕后釋噲或曰平畏吕后而已矣曰不若是則高帝以
譖殺功臣吕后怒亦且報平勃平勃死則諸吕強又誰
制矣哉高帝之不枉樊噲吕氏之不害平勃平勃得以
誅諸吕安劉氏由燕之謀也不亦善乎

或曰劉隗其亮直者歟曰敗中宗者此人也漢興至于孝景庶且富矣鼂錯以天下壓山東卒動七國橫屍東市中宗資王氏以有江左其強固宜帝不以術縻之隗方翩翩執刀筆以裁其末力不任兵而假鎮以亢斯足以速禍而已矣魯昭公不忍季氏薨于乾侯晉元帝不忍王敦憂憤告謝子家駒諫而劉隗勸焉隗之罪著矣帝終不悟雪涕而遣之闇哉


孔子惡稱人之惡者子貢惡訐以為直者夫有口才又

有文法以羽翼之而忘忠恕何所不逮也其甚者干人
骨肉不避父子時主以為忠識者以為賊國無釁焉則
以自斃一有可為則危宗廟矣自斃者商鞅是也刑太
子傅黥太子師惠王既立身裂車下危宗廟者江充是
也太子家使行馳道中充以屬吏謝之不聽階為巫蠱
殺戾于湖武帝始以充忠直奉法不阿所言中意故則
作思子宮歸來望思之臺嗚呼噬臍也已

或問泉鳩里加兵刃於戾太子者初為北地太守後族

何變之暴也以為罪邪何以賞以為功邪何以誅賞之
是邪誅之是邪曰理必然也夫骨肉之恩本諸天也怒
有已時而愛無已怒而欲殺則殺者功愛而不可得見
則殺者罪矣夫豈不知殺之之由我也內無以慰其心
外無以慰人心故歸咎云爾文帝逮諸縣傳淮南王不
發封餽侍者皆棄市彼輜車封誰敢發邪非其人之罪
也借其死以謝天下也小人因人喜怒以貪功而不度
深淺禍其至矣故齊王自殺而主父偃族滅魚復侯不

得還闕而蕭順之憂卒聖人作議親之辟公族三宥所以養恩而小人間之亦不知量矣知其說者其田千秋乎其爰盛乎



盱江集卷三十三

欽定四庫全書

集部
盱江集卷三十四

五

詳校官庶吉士_臣李如筠

檢討_臣何思鈞覆勘

總校官進士_臣楊懋珩

校對官助教_臣羅萬選

謄錄監生_臣李玠

欽定四庫全書

盱江集卷三十四

宋 李覲 撰

常語下

或問自漢迄唐孰王孰霸曰天子也安得霸哉皇帝王
霸者其人之號非其道之目也自王以上天子號也惟
其所自稱耳帝亦稱皇書曰皇帝清問下民是也王亦
稱帝易曰帝乙歸妹是也如其優劣之云則文王武王
劣於帝乙者乎霸諸侯號也霸之為言伯也所以長諸

侯也豈天子之所得為哉道有粹有駁其人之號不可以易之也世俗見古之王者粹則諸侯而粹者亦曰行王道見古之霸者駁則天子而駁者亦曰行霸道悖矣宣帝言漢家制度本以霸王道雜之由此也人固有父為士子為農者矣謂天下之士者曰行父道謂天下之農者曰行子道可乎父雖為農不失其為父也子雖為士不失其為子也世俗之言王霸者亦猶是矣若夫所謂父道則有之矣慈也所謂子道則有之矣孝也所謂

王道則有之矣安天下也所謂霸道則有之矣尊京師也非粹與駁之謂也

或曰詩人以后稷先公致王業之艱難其非諸侯矣乎曰武王既得天下詩人迹其世世脩德始於后稷公劉以至于太王王季文王故云爾也當商之未喪誰有此言乎如使紂能悔過武王不得天下則文王之為西伯霸之盛者而已矣西伯霸而粹桓文霸而駁者也三代王而粹漢唐王而駁者也

或曰祭法共工氏之霸九州說者以無錄而王謂之霸在太昊炎帝之間然則霸非天子者乎曰說者之過也項籍亦嘗霸九州矣在秦漢之間矣尊懷王為義帝分天下以王諸侯自立為西楚伯王非霸九州而何也然謂籍曰天子可乎彼共工氏蓋籍之類也敢問陽尊義帝俄自殺之亦足以為霸乎曰謂其號也不言其道也或曰文王受命稱王有諸曰否不得已而伐紂可也紂猶未伐功未加於民而遽自立以昭其私焉孰謂文王

乃爾武王舉兵建大號追考虞芮訟息之年以為受命之始故曰惟九年大統未集十有三年春大會于盟津非西伯實改元也文王世子西方有九國焉君王其終撫諸後人追為之辭非西伯實稱王也大傳牧之野武王之大事也既事而退追王太王王季文王昌是也康成取緯候以亂之過矣

或問魯用王禮何如曰成王以周公勲勞命魯公世世祀周公以天子之禮樂周公尊矣故禘文王郊后稷皆

倣王禮而不備焉周公而上王禮可也魯頌曰皇皇后
帝皇祖后稷享以騂犧是饗是宜降福既多安有非禮
而頌之云乎周公而下則僭矣隱五年九月考仲子之
宮初獻六羽公問於衆仲始用諸侯禮也

或曰地方七百里有諸曰信也然則孟子何言乎儉於
百里也曰閔宮頌僖公復周公之宇而曰公車千乘朱
英綠滕千乘之地方三百一十六里有畸山陵林麓川
澤溝瀆城郭宮室塗巷不與焉其何儉於百里也世俗

疑周官五百里以其大也是亦不思耳矣諸侯之於天子非若敵國然也大國貢半次國三之一小國四之一諸侯有其地天子食其稅璧之一郡而已矣魯七百里開方之而四十九殆半王畿也今之大郡不有半京畿者乎

或曰紂囚文王七年諸侯皆從之囚紂於是乎懼而歸之有諸曰紂以崇侯諧囚西伯謂其得衆也諸侯又從之囚其疑膠矣彼諸侯之力足以勝紂邪盟津之會者

八百武王猶退師當此時也固未足以勝紂矣力不足而從之囚徒使其疑且怒耳紂能脯鬼侯而不能殺西伯邪是好事者之語也若夫三子獻寶則有之矣然則聖人以賂免邪曰狄人侵邠太王以皮幣犬馬珠玉事之矣文王曷不可況三子者之愛其君邪君親之難何所不為也

或曰文王獻洛西之地赤壤之田請紂除炮烙之刑有諸曰以炮烙為是邪非邪是則不可以除之矣非而請

除之則發紂之惡也賣恩於民也姜里之囚既免又激怒之豈人情邪彼惟恐昭昭之不晦圭角之不利也易曰內文明而外柔順以蒙大難文王以之其斯之謂矣或曰湯文王雖為二伯其國不出百里也曰唐之刺史有一州耳其領節度觀察則連十數州有之矣彼中分天下而治之威權所及百里而已乎後雖三分有二其益者未多也敢問湯崩太丁未立外丙二年仲壬四年則是太甲不繼湯也曰書序成湯既沒太甲元年不言

仲壬也就令繼仲壬為人後者為之子太甲固三年也或問聖人之道固不容雜也何吾子之不一也曰天地之中一物邪抑萬物邪養人者不一物闕一則病矣聖人之道譬諸朝廷朝廷也者豈一種人哉處之有禮故能一也女子在內男子在外貴者在上賤者在下親者在先疏者在後府史徒胥工賈牧圉各有攸居而不相亂也夫所以謂之一也他人之不一則闐闐耳終日紛紛而無有定次也夫所以謂之雜也世俗患其雜則拘

於一是欲以一物養天下之人也白而不受采則人皆
縞素矣何足以觀之哉其歸於諸子而已矣

聖人無高行何謂也曰聖人之行必以禮也禮則無高
矣夫其高者出於禮也異於人也故能赫赫之如彼也
孔子事親無異稱居喪無異聞立朝無異節何也安禮
也出於禮者非聖人也矯世者之為之也敢問聖人有
過歟曰加我數年五十以學易可以無大過矣夫豈無
過哉或曰孔子謙也曰仲虺之美成湯改過不吝豈成

湯之謙也哉世俗之說者則謂聖人無過顏子不二猶或為之辭徒使人君之耻過也而不欲聞之也

三代之政可得而言歟曰民不知之也商因於夏周因於商損之益之未嘗與衆忤也周公之制諸侯因舊國而大之百姓因舊田而廣之天下得不和乎哉世俗之說者必曰復古古未易復也商鞅之除井田非道也而民從之各自便也王莽之更王田近古也而民怨之奪其有也孔子曰愚而好自用賤而好自專生乎今之世

反古之道如此者裁及其身者也

孔子之為司寇也不聞其改法度也沈猶氏不敢朝飲其羊公慎氏出其妻慎潰氏踰境而徙魯之粥牛馬者不豫賈必蚤正以待之也世俗之說者不曰正其身徒囂囂以疾人之法度其亦非孔子之志也

大哉孔子吾何能稱焉顏淵曰仰之彌高鑽之彌堅瞻之在前忽焉在後仰之彌高也則吾以為極星考之正之舍是則無四方矣鑽之彌堅也則吾以為磐石據之

依之舍是則無安居矣瞻之在前忽焉在後也則吾以
為鬼神生之斂之舍是則無庶物矣他人之道借曰善
焉有之可也亡之可也夫子之道不可須臾去也不聞
之是無耳也不見之是無目也不言之是無口也不學
之不思之是無心無精爽也尚可以為人乎哉吾於斯
道夜而諷之矣晝而讀之矣髮斑斑而不知其疲矣終
沒吾世而已矣

盱江集卷三十四

欽定四庫全書

盱江集卷三十五

宋 李覲 撰

古體

三賢詠

魯連誓蹈海夷齊甘采薇秦王不得帝周武見終非輕
死議萬乘強哉三布衣凡人欺貧賤貧賤豈易欺

和蘇著作作麻姑十詠

魯公碑

他人工字書美好若婦女猗嗟顏太師赳赳丈夫武麻姑有遺碑歲月亦已古硬筆可破石鐫者疑虛語驚龍索雷關口唾天下雨怒虎突圍出不畏千強弩有海珠易求有山玉易取唯恐此碑壞此書難再覩安得同寶鎮收藏在天府自非大祭時莫教凡眼覩

七星杉

五行與萬類有象皆在天如何彼杉樹反更侔星躔予思古昔意欲媚茲山巔草木尚有斗人物誰非仙栽培

自何代衰老今多年大旱不減翠涉春無益鮮生當好
世界過盡閒雲煙房心欲布政柱石安可捐

煉丹井

丹竈久已毀井泉空獨存此地非常地今人非昔人我
願刀圭藥輕舉朝明宸一言洗天日萬物歸陽春羣仙
誰嫉妬使我身漂淪俯視廢井水欲飲礙荆榛徘徊片
雲下泣涕沾衣巾少壯幾何時且醉樽中醇

玳瑁石

前有縣大夫取此石為器囂然夸謂子材與工俱美如
何爾鄉人器用曾莫備無乃居荒陬俗鄙不喜事答云
此石堅攻磨動時歲官用錢出民民用錢出已出民官
不知喜一作意事誠可貴出已乃傷財誰能一作其不惜費
大夫聞此言如有所忿戾今君倡是詩敢以報嘉惠

秦人峯

秦法雖甚苛秦吏若猶拙山林不數里俾爾逃得脫子
觀後世事政役火烈烈苟非為鬼神何計避羈紲聖皇

今在御百事成均節常披詔書意苦念生財竭誰能將
順者所望在賢哲無使峯中人笑我民屠裂

流杯池

幽居久不樂心死如濕灰聞言山有池仙客曾流杯披
衫向西坐欲望無崇臺何當命遊宴盡聚不羈才顧恐
狹隘地未足開吾懷仰手斲河漢決向天南來移舟復
轉嶽壑逼成環迴橫持北斗柄量盡酒星醅箕踞接下
流一畝空千壘八風助吟倡萬怪供嘲諧醉來散髮卧

蠅聲視霆雷冷笑勢利子茫茫塵土堆

碧蓮池

碧蓮何歲開我時不得見于今到池上只有紅蓮綻紅蓮非醜惡物以多為賤阿蠻雖解舞不見真妃面

虎跑泉

虎跑本何為彼將對以臆有如大丈夫卓爾抱剛直盜泉既不飲諧人亦不食山中小禽獸何足勞捉搦勇氣無所泄爪地成遺跡地神嘉乃誠水源如開闢尋常竊

六畜夜傍人牆壁是與豺狼同聞此宜慙色

丹霞洞

山西十數里乃是丹霞洞直上窮雲霓中寬入罌甕紅
塵生不識明月手可捧人家千里庭泉源六月凍風雨
氣勢惡草木精神竦靈物少形見仙官何職貢俗緣易
厭倦世事足愁痛寄語松上鶴他年期一控

葛仙壇

仙翁猶在時壇上何設施仙翁一去後夢草空離離下

士固大笑言者多不知嗟嗟天壤內共是枯魚池

穫稻

朝陽過山來下田猶露濕餉婦念兒啼逢人不敢立青黃先後收斷折偃僂拾鳥鼠滿官倉于今又租入

哀老婦

里中一老婦行行啼路隅自悼未亡人暮年從一夫寡時十八九嫁時六十餘昔日遺腹兒今茲垂白鬚子豈不欲養母豈不懷居繇役及下戶財盡無所輸異籍幸

可免嫁母乃良圖牽車送出門急若盜賊驅兒孫孫有
婦小大攀且呼回頭與永訣欲死無刑誅我時聞此言
為之長嘆嗚天民固有窮鰥寡實其徒仁政先四者著
在孟氏書吾君務復古旦旦師黃虞赦書求節婦許與
旌門閭繫爾愚婦人豈曰禮所拘蓬茨四十年不知形
影孤州縣莫能察詔旨徒成虛而況賦役間羣小所同
趨姦欺至骨髓公利未錙銖良田歲歲賣存者唯萊汙
兄弟欲離散母子因變渝天地豈非大曾不容爾軀嗟

嗟孝治王早晚能聞諸吾言又無位反袂空漣如

寄懷三首

鳥獸死有用羽角筋革齒輦輓入工師飾作軍國器玉
食白如瓠瞑目已腐穢生者不敢留埋藏與螻蟻百年
富貴身孰若鳥獸類唯有令名人終古如不死

又

根生但為松翼飛但為鳳王侯尚可輕道義本來重癡
兒似婢妾寸步矜恩寵傍人忍笑時佯把衣袂弄

又

齷齪復齷齪淺謀同燕雀不思明日憂但取今日樂俗
儒抱書卷未去眼中膜誰將古人淚更為今人落

避暑

富貴責且重慙恥心如何貧賤事易了飽煖幸已多大
熱火天下虛堂枕山阿拔俗嫌人影考古分賢科漱冷
齒雙噤飲香顏半醺一跌或移日遇狂還自歌去就各
有志彼此無相訶原憲豈嘗病賜也徒來過

喜雨

人皆喜膏澤我獨憂豐年歲凶已賤糶年豐安得錢賦
後忽驚駭倉廩甘棄捐銖銅苟可換富貴寧我憐歸來
官事了相弔柴門邊農夫未盡死穀價應常然王心幸
仁聖分職當忠賢謂穀賤為美咄咄無欺天

送上官直

失意多怨尤有誰能自知遊人務乞丐之子唯求師成
名在積善干祿先闕疑根本苟深固春風諒無私

題昱師房三笑圖

高僧不出院屏畫三笑圖客子倦遊者欲去復踟躕古
人骨朽不可追今人相見如古時人間觸事入吾笑何
必門前有虎谿

寄祖祕丞

我本山田人好尚與衆異平生重交遊所得固無幾昨
者應茂才西行覲朝美時當慶厯初選舉實多士茫茫
帝王州栖栖遠行子携錢賃破屋乞火蒸陳米鞍馬到

即賣僮僕癡難使有時造公卿努力向塵市數步則一
歇長吁乃能起衣冠信質野言語欠婉媚閭人顧之笑
將命見而避往往得所請蹌蹌向前跪何能剖懷抱浪
自慕尊貴貴人如天神喘息生雲氣野夫等麋鹿芻豢
非所冀歸來坐空窻惆悵夕不睡塵埃滿鬚鬢臭惡入
口鼻業已辭吾親中道豈可廢僂俛待報聞愁憂遂經
歲二年正月晦閤房適假寐有奴來啄門手披上聲擇之
刺承命驚下牀赤脚誤穿履從來未識面只是聞高第

名顯宦且達見我當何為再拜請就席熟視知可畏昂
昂貌甚古崖石掀氛翳渾渾氣甚和璞玉無芒銳高談
貫先哲雅意在茲世昔人相遇間一言猶合契今吾於
擇之寧假再三計自此習往還中心蔑疑貳如熱息廣
厦如飢享盛饋君授南康守舟維蔡河涘我館汴之陰
前去路則邇時時結帽帶踽踽尋英軌衆人嬌綺羅相
對紉蘭芷朱絃自三嘆笑殺彼鄭衛王命有期日都門
一反袂君行劇鴻軒我處近匏繫曠日及孟秋皇慈始

收試崇崇九門開竊竊三館祕主司隔簾帷欲望不可
跂中貴當棖闌蒐索徧靴底呼名授之坐敗席鋪冷地
健兒直我前武怒足防備少小學賢能謂可當賓禮一
朝在檻阱兩目但睥眄捉筆析所問移時數千字讀書
取大者纖悉或靡記炙背雖自竒寧當至尊意龍馬騰
天衢駑駘合羞死量才與揣命坦蕩更何事振衣託歸
舟河流迅弧矢淮清江且平踰月在枕几及過廬山南
聞君初布治船檣既入岸馬首已來暨迎我到府署相

見共欣喜嫩橘摘千苞肥魚斫千尾蕭晨徹骨清佳境
邀人醉高會雖暫歡故園當速至草草成別愁悠悠渡
湖水是時東方曙俄然北風厲陽烏畏威逃江神以儒
戲氣象斗不同波濤大可憐長帆張去聲欲裂孤舟蕩無
倚或從玉井出或自銀山墜篙工斂手立脉脉無窮淚
從者閉目坐嗟嗟不敢視我時撫牀歌分去聲作長江鬼
所恨生劬勞不孝而已矣禍福果無妄險難行可弭脫
身得平康引領望鄉里厥後過浹日幸得見維梓入門

何怡怡饌具有甘旨推女能紉針驕兒徧生齒芟除閒
草萊疏通舊沼沚吾廬可終焉生計由此始郡守方仁
賢學宮盛脩理踵門致勤恪命我論經藝麻衣何紛紛
鄉人子若弟不唯務章句所欲興禮義施為有本末動
靜有綱紀蚤與鷄同覺夜與月相值孳孳忘飲食齟齬
在文史時附南康書或逢北來使尺素雖滿前話言難
到耳殆及三年冬聞君受朝寄名稱按刑獄勢可平冤
滯故人漸大任賤子差自慰軒車日已遠翰墨益難致

薄命良可傷降災渾未已
是年之季冬舉家纏疫癘老
母尚委頓微軀蓋螻蟻形骸
非我有魂魄與心離權柄
在鬼物功力非服餌曉突誰
能炊午闕猶未啓荏苒再
周月幸會天不棄春風動枯
槁甘雨澆根柢行行夏交
秋吉微凶不替高堂何戚戚
疾病日攢萃一夕脾臟間
發泄不復止詰朝問無言目
瞑口齒閉號呶諸兒孫雜
沓大鼎沸嗟哉當彼時誠恐
弗可諱醫師相急熱巫覡
兩經緯藥草極酸辛法術殫
怪詭薄暮乃復蘇踰旬僅

知味方茲戀庭闈旋已對獄吏試言其所由內省亦無
媿有人同州問發迹自徒隸竊被儒衣裳曾亡小材技
突如游京邑欲以干明獻朝家焉可欺羈旅謀自濟乃
造黃紙書便取青袍衣乘船歸南方斂板謁當位自言
章奏竒因藉宦官勢詔文降自中宰府不預議既云能
占天且曰善興利江淮一經過郡府十不啻到處爭逢
迎莫能思處置轉運苦愛竒得之如國器故使按坑冶
庶可展才智小人靡忖度假寵愈放肆行符索更卒園

印發傳遞閭閻望塵拜州縣從風靡遮道結綵鋪筵
塞珠翠車騎前後呵給使數百指何者為典刑獨自誇
爪觜在昔秦無人繞朝贈之箠繫我非聾瞽碌碌寧不
耻作書貽諫官姦詐患不細有詔令逮捕按驗取真偽
是夫知計窮誣我以罪戾上官猶眩惑準例皆拘係幽
幽囹圄中憤憤爭競裏周旋二十日乃克見巧敝畫地
尚不入叢棘曷可寘惟茲謝吾母幾不全髮體教道亦
難行凡庸豈同志吁哉養英才徒以釣積毀篋書歸敝

廬庠門任蕪穢去年仲夏後盛暑若火熾郊園有餘爽
蔬果聊可嗜時復觀田疇畢力奉耘耔人生但飽暖此
外皆浮侈思君非一日欲去無雙翅俄聞遷黃州又說
丁喪制古來聖與賢誰不遭醜詆蜀日駭狗犬夏鼎愁
魑魅人壽有短長孝子謾憂思滅性經所貶節哀禮為
是矧夫王佐才簡在唐虞際揚名以顯親報德豈不難
加飯苟如願蒼生猶有恃適時匪我長不朽乃所擬道
義果弗充富貴反為累回憲本無官桀紂焉得此俗子

但相非吾心已居易近者游葛陂念君在袁泉作詩布
幽懷讀之勿嗤鄙

名男曰參魯以詩喻之

孔門有高弟曾子以孝著求諸聖人言尚曰參也魯才
敏誰不願顧恐難荷負苟無德將之何益於父母昔如
吳起者善兵亞孫武鬻臂游諸侯親喪哀不舉楊彪有
子脩器能頗可取一旦以罪誅舐犢徒虛語吾生本薄
祐略無兄弟助及汝又一身不絕如線縷祖母唯汝愛

無異所生乳寧止託祭祀亦欲興門戶伎倆勿求名適時乃有補計慮勿尚巧合義乃可處持重尚寡過摧剛庶無懼內以保家族外以揚名譽高山在所仰今人豈殊古參魯為汝名其字曰孝孺

女色無定美贈卿材

女色無定美寵至美則多士才無定稱用顯稱已過長安小家子粲粲秋池荷性慧不覺耻母憐不加訶出口一囊麝見人雙眼波情動笑難止語嬌音屢訛都人口

如沸觀者踵相摩因緣幸充選恩澤成偏頗少費萬金
珠一呼千綺羅佯愁慘白日猛唾傾天河東鄰有賢女
春綠涵脩蛾花艷不裁翦玉光無切磋自小固聞禮藏
頭豈知他親戚尚未見媒官當奈何過時誰問訪生世
就蹉跎豈不有配偶市里或山阿豈不有奉養舂餼與
機梭列女不得傳樂府無人歌容華日衰落涕泣坐滂
沱富貴易脩飾貧賤多笑呵柳下無仲尼小官終滅磨
進退在勇決遲疑兩皆蹉退當事奇偉夙駕追雄軻進

當取勢位健筆為干戈胡然守一節獨自埋隨和

江亭醉後

平生尚倜儻壯大苦摧折主人能結納佳境為鋪設渺
滛東江來豁舒暮雲裂倡女稍多藝市酒且供啜俠氣
復何聊心朋幸相悅解冠從放蕩大呼誰輓制咄哉千
里足嗟乎三寸舌海物喚龍取天葩令鬼折艷唱聲非
雅戲談理當譎帷房笑私昵閭巷嘲瑣屑更鼓莫催睡
夜風纔去熱俗士鮮大志于今重小節內行豈在泥外

貌犬伏紲吾儕古豪傑方寸浴日月被謗肯自疑為歡
顧猶拙放飯彼不慙使我無齒決

寄章友直

人生何足貴貴在天資秀譬如沙石間金玉豈常有有
才不善用多為淫邪誘嗟哉棟梁材往往厄樵手章子
吾不識美在衆人口如何材藝多四十無所守所守者
何為非貴亦非富古今聖與賢歷歷垂星斗景行苟有
成進退無一繆不能攻天下尚可名身後百年隨飄風

白髮勇未鬪良時且不反飲恨唯尸柩無謂學已足大海難掬漱無謂過可文希珍尚磨垢智者當自知既往誠何咎西子蒙不潔見者掩鼻走惡人幸齋戒上帝必孚祐相如竊妻逃犢鼻從沽酒一朝賦上林在漢為稱首努力念前哲吾言非子詬

中春苦雨書懷

春秋書大雨三日已為霖如何方春時終月常積陰淙空若泉瀉盪地成淵深曾無晝夜別顧恐山嶽沈疑是

天上河底漏不可禁傍無女媧石欲補難為針又疑坎
宮水陽曜所不臨何等大鬼物戲把北斗斟誰籠三足
烏冷卧空桑林勾芒失權柄羞耻啼盈襟枉殺幾樹花
恣許泥土浸一作侵或云天有意欲使誅荒淫田穀彼何
罪芽穎當森森一粒且漂溺不啻千黃金路絕弔客行
餒我一作死憂巢禽風聲怒打屋寒氣獐穿衾況我出山
遠久次茲江潯嗟嗟歲月晚悠悠金玉音無聊但詼笑
有得還歌吟莫怪旅愁甚旅人千萬心

弋陽縣學北堂見夾竹桃花有感而書

暖碧覆晴殷依依近朱欄異類偶相合勁節何能安同
時盡妖艷無地容檀欒移根既不可潔心誠為難外貌
任春色中心期歲寒正聲尚可聽誰是伶倫官

孤懷

智者在不惑君子貴知幾彼昏有耳目無能辨是非蜀
犬盡鳴吠羲輪自光輝古人不可作垂涕沾吾衣

讀韓文公駮驥篇因廣其說

主人渴良馬僕夫念驚駘行遲追易及力少牽易來時
聞千里足百箭攢其懷主人雖欲買衆口大悠哉

送陳次公茂材

俗人無心曾貴偽不貴誠口吻當文學奔走成名聲之
子出蒿萊行潔業且精中美未外發樸質亡華英持此
嚮廣衆詎免笑與憎况復覓薦舉路險豈易行所願天
命泰因之主者明牙絃一鼓時鍾子耳必傾

蝦蟆

蝦蟆爾奚為閤閤攪人耳在官不為

去聲

官在私無私事

徒將一寸口日夜相鳴吠豈能劓語言且欲譟夢寐何者孔稚珪愛之如鼓吹誰論正與淫各自有知己

惜鷄詩

曩子家居見鷄有異者為之動心嘗欲作詩而不果戊寅夏五月學于山中乃追賦之曰

吾家有雞母乘春數子生生來踰六旬互覺羽翼成其母且再卵逐之使離散衆雛既不來一子獨戀戀戀戀

不肯離逐之終不移母行無險易唧唧相追隨卵生亦
云足母伏窠中宿厥子苦無依攀背如悲哭窠中母所
安忍渴復忘餐子於背上卧不捨須臾間我時見之喜
異類能如此因欲觀其終其終諒何似一朝大長成乃
知牝牡情膨膨娠在腹漸見東西行行行求飲食欲以
助生息卵出子還多養子何勞役朝啄荆草林暮爪汙
泥深昔時隨母意今作愛雛心雛生誠可愛母老寧忍
背物性乃不常使人心歎慨物類本無知無知孰責之

斯鷄與衆異酷似有天資天資以仁孝變更何太早況
彼本無知血毛安足道萬物靈者人孰不念其親少艾
與妻子所以奪吾真五十慕父母虞舜稱稽古埋子得
黃金邇來唯郭巨古人往莫追言之淚沾衣斯言足自
警題作惜鷄詩

日出吟

日出百鳥喜羈人嬾舉眸長恨年光緩祿養未可求若
至年光過高堂又白頭羲和君有知奈我心悠悠

聞女子瘧疾偶書二十四韻寄示

昨日家人來言汝苦寒熱想由卑濕地頗失飲食節脾
官驕不治氣馬癡如絛乃致四體煩故當雙日發江南
此疾多理不憂顛越顧汝僅毀齒何力禁喘噎寄書詰
醫師有藥且嚼啜方經固靈應病根終翦滅但恐崇所
為嘗聞里中說茲地有罔兩乘時相胃結嗟哉鬼無知
何於我為孽我本重脩飾胷中掬冰雪禍淫雖甚苛無
所可挑抉疑是饕餮食魂私求盤碗設畫室唯琴書何路

致葷血無錢顧越巫刀劍百斬決徒恣彼昏邪公然敢
抄撮吾聞上帝靈網目匪疎缺行當悉追捕汝苦旦夕
歇慈愛早有加憶念今逾切塵勞差可畏歸計又云輟
所生能劬勞祖母矧聰哲羸卧縱未蘇撫視諒非拙勉
勉多自安風來信勿絕

讀史

子長漢良史筆鋒頗雄剛惜哉聞道寡氣志苦不常心
如蟲絲輕隨風東西揚一事若可喜不顧道所長公言

紂原憲俠賊乃為良仁義謂足羞貨殖比君王黃老先
六經斯言固猖狂吁嗟夫子沒兩觀無刑章予懷班孟
堅駁議何洋洋傳與後世人慎思其否臧

和育王十二題

筠州楊屯田以僧常坦詩俾
予和之題之義坦自有解

金沙池

遙聞金在沙知是虛名號世人方競奢何茲有遺寶

佛迹峯

佛迹空在茲佛心無處所尋迹以求之似學邯鄲步

七佛石

萬物雖散殊孰非道之體何必石岩岩方疑金色臂

袈裟石

梵教一來東羣心日歸向土石至無情也作披緇狀

明月臺

月色固無改臺基亦不壞嗟哉翫月人古來誰更在

石屏風

形模皆自然樹立豈人力松影與秋光掃成真水墨

靈鰻井

田苗自枯槁井鰻人所禱若教龍有靈此魚何足道

供奉泉

璘師鑿此泉晨夕奉親老因知達者心豈嘗離孝道

育王塔

嘗聞有為法佛說如夢幻胡然窳堵波香花耀凡眼

八角殿

晉後千百年茲殿儼如昔梵宇若皆然應須省民力

晉年松

典午既陵夷羣材共淪謝唯有青青松于今被王化

重臺蓮

長疑佛界中天女來行樂為怕山風寒仙衣盡津重著忍

美女篇

繁霜毒春木花開苦不早愚夫擇利婚美女貧中老曷
不治顏色門前車馬道閨房有禮文自銜誰言好俗態
競朱粉古心慕蘋藻所期君子恩卒以慰枯槁

苦熱夜

熒熒背明燈黯黯垂疎帷階庭豈不好蚊蟲苦相期壞
扇無清風暗樹多斜枝屈指山泉侶寂寥空所思

丐僧

靡靡步康衢喋喋問流俗誰將今日財願易來世福休
論身善惡佛眼重金玉

閔俗

君門若無祿陳編孰能讀公庭若無法穢德誰不足煦

煦儒者言沈沈小人腹傷心勿復道拂絃寄清曲

感歎二首

世常羞貧賤貧賤非我羞道成不見取貧賤誰之由
陛楯擁堯舜廊廟居伊周面對豈無說咫尺路阻脩浮雲
闕太虛白日光逆流嗟爾臨人者蔽賢天所仇

又

得志萬罪消失志百醜生誰云王路寬枯槁不敢行出
言到口角縮舌悔恨并自省猶若此況乃蚩蚩氓故知

當今賢未有非簪纓

寄鄰父

離山闕歸期滯蹤如在獄他門一嚮炙賤子萬端辱吟
憶圃花盡夢知原麥熟公言富貴遲何似耕穫速

竹齋題事

低齋結空野小竹移孤林齋閒竹淨好日媚幽人心南
方夏厭暑獨此留殘陰夏雨挫促夢穿風搜涼襟長茵
展麗鮮亂歌奏歡禽侍奴裏村服語客拋塵簪志高成

利讎言思爽生詩淫值聖喜盈卷感古悲入琴山迎穩履
遠月勸澄杯深榮名雖未染幸亦非堙沈

贈黃秀才別

朝闥入有籍疏遠難見君世眼不識道貧賤無高文蘭
蕙生同草鴻鵠心在雲贈子喜別離兒女安得聞

雨中作

羣陰侮陽德雨陣春嘈嘈白曉慘成夜瓦口生飛濤凝
雲列山鞘冷氣攢衣刀徑開有松竹庭卧唯蓬蒿花淫

得罪隕鷲辯知時逃隰苗出水短木菌隨日高微吟雅
於樂快飲甘如膏朱曦待未見天蓋空牢牢

獨居

苔根跨階發白雨滿四簷春眠嬾下枕日午誰開簾浮
塵裏酒榼餒蟲鏤書籤榮樂豈不欲非義固所嫌

閔雨詩

吳江之南是曰豐國五種之生天下食一歲不登吾民
菜色如何天不仁縱彼旱孽稱其神矯矯赤龍推火軒

來自東南山咸池悞水不敢沃陽侯失色愁烹煎况兹
獸畝流涓涓何足吸之唇齒間但見禾與黍蓬勃紅塵
起土伯勅其屬掃路迎飢鬼哀哉氓蚩蚩託身釜鬲惟
蒸炊小人怨咨君子知天生天殺今其時我聞皇穹大
德在生育愛養萬物同嬰兒產民之身賦民食中道絕
之何所為當時冥冥間委任非其宜山川之神各守土
羣龍受位司天池上帝當軒親戒勅十日一雨無愆期
帝心仁且信臨下固不疑謂言庶事有分職屏去視聽

思無為安知愚下鬼負德孤恩難制指弄天之權侮人命貪嗜牛羊邀祭祀忽焉一物不稱情因教此旱灾生靈雷霆之官畏罪莫敢諫頭枕天鼓眠不醒帝在紫微垣下隔千里雲徒勞銜血向空哭帝心雖聖安得聞北斗侍帝側幹運氣母均四時五星暨衆宿照曜亡偏私夫何容此鬼恣行胃臆輕天威定是機務繁耳目有所遺小臣亦何者草莽負奇節欲係神頸無長繩欲斬龍頭劔鋒缺皇穹如未察凶邪空使小臣心鬱結

訪周道士

豈無飲食奉歡樂亦有賓客相追遊宿醒在枕或時起
俗話入耳令人羞偶隨賢友訪仙子一臨花檻斟瓷甌
塵埃何處是浮世松竹此地長清秋古來擾擾富且貴
天下茫茫公與侯蓋棺事了何足數乘輿嘯傲真良壽

甘露亭詩

乾坤父母莫匪慈胚胎億兆成角羈其間哺乳不及處
有時泣殺呱呱兒南川上游號沃野景祐丙子嘗凶饑

新田始苗舊穀罄十室八九無晨炊伏陰何者不仁甚
釀作水災來助之煙煤刷天雨汁黑嘔山泄谷爭奔馳
橫流一夜打城郭萬弩竊發穿毛皮東隅有洲尸揖揖
如蟻欲走遭水圍屋根無力樹腰折蛟蜃食人猶擇肥
濤波一望萬山阻六親不得相扶持國子劉公好仁者
惟時假守茲軍麾民生在我不在命告舟往救無敢違
童兒赤立婦女困載之刳木何累累泥沙外冷內飢渴
口噤不語如狂癡牽攣坐卧滿府舍賦以酒飲加饘糜

隨流往往亦不死遠在百里無人知捐金購得問姓氏
召使親族携之歸司農倉廩盡發出待奏報先施為
有餘況可補不足大賈蓄家如響隨來瞻去察夜繼晝
赤熱不忍蔭華棖由斯一郡十萬戶餓膚日月生膏脂
存者相保沒者葬唐虞仁壽重岐躋聖主養賢賢養物
氣和郁郁通高卑城西老宮古松徑一朝隊露甘如飴
千柯萬葉結不解玉階瓊樹光離離叱俗奔走競觀覩
手攀口吮同齋咨學老之人周氏子好善不類黃冠師

欲令事迹約久遠築亭其地高巍巍公之歸朝不可借
松樹至今猶未衰我作此詩揭亭上他年墮淚如羊碑

送丘寺丞

嗟予兀兀何施為學無異意唯傳師嘗言先聖所述作
人事而已無他岐安知步步有天道繫我丘師能識之
春秋下應三千歲雅頌周流十二支闡幽大傳與隱旨
圖寫轉匝成圓規勞兄示我復教我一字不曉如癡兒
文侯聽樂唯恐卧今我幸免指目皮丘明子夏言不及

我兄所得何神奇直疑前身是顏子獨受師說無人知
又疑夢寐感靈怪常與周孔相追隨不然悠悠千載後
何傳何習遽如斯窮愁著書古有例昨官閨中今海涯
海涯路遠學者少斯道未有施行時聖皇誅賞甚明白
歸來奏牘無遲遲江南鴈雪片如掌酒花上面寒力衰
是非得失從此止馬頭一別東西馳

答緣慳師見示草書千字文并名公所贈詩序

佛繇西域漸中土欲使羣心皆鼓舞若顓梵語及梵書

昧者雖從明孰與其徒往往多材能暗結時賢為外助
遠公自昔來廬山誇逞蓮花邀社侶吁嗟君子遭亂邦
舍此未知何處去邇來一行善記覽齧破乾坤尋厯數
或攻文苑掠芬香辭則貴休筆懷素其餘曲藝與小詩
布在人間難悉數賢豪大抵多憐才引致門牆無齟齬
其人既重法亦尊羽翼大成根本固我緣山谷見不遠
緇褐憧憧盡愚魯坐量此去朋黨衰纖縞焉能拒強弩
去年有使自番陽手藉一函來我所發函乃是緣際書

千字滿前雲縷縷衆人飽食已用心欲噍伯英肥美處
當時名士嘉其能長序短篇聯繡組因思幅員千萬里
如師之能更幾許以儒輔釋日益多何恤區區一韓愈

春社詞

并序

寶元二年嘗夢大雨震所居室驚而仆地既已有一人
甚長大紫衣而冠意謂雷之神也呼覲使前授之題曰
春社詞詞或作篇
字不能審覲懼栗栗援筆得八句與之及覺尚
記其首二句頗怪麗今七年矣值暇日以五句足之

吳臺歌春鎖春色雨刷花光入龍國田邊大樹啼老鴉
野雲癡醉寒杳牙年華欲住風雷惡蘭臉知秋淚先落
時榮時謝無了時扶起混沌須神醫

聞訓狐

昔年因讀昌黎文知有訓狐猶未真客堂昨夜滅燭後
一聲竊發誠驚人慈母入席匪虛語據此麕暴誰敢聞
殺人之子養爾子天地不管胡為仁豈無鷹隼善搏擊
去路昏黑難相親亦有弓矢可彈射卻恐誤中東西鄰

我今獨處雖無懼
聒不得睡寧不嗔
嘗聞鳳凰百鳥君
丹穴萬里誰能言
行當整頓九韶樂
奉迎綵羽掀重雲
直前再拜列爾罪
爾軀何足為灰塵

聞喜鵲

翩翩者鵲何品流
羽毛白黑林之幽
生平智力可料度
有巢往往輸鳴鳩
天然卻會報人喜
愚兒幼婦唯爾求
萬聲千噪幾曾驗
聞者終是軒眉頭
從來烏鳥愛反哺
孝慈情性誰可儔
其間於事最先見
告人凶禍令人憂

憂時不肯自脩飾禱請神鬼爭啾啾告之愈驗愈見惡
去聲共云灾患鴟之由彈丸瓦石相驅逐名園佳樹難依
投忠言逆耳世罕用屬鏤曾割伍員喉莫笑後來司馬
公事事稱好真良謀

解湯延祖字

仲尼作經授曾子明稽至孝之終始始於事親終立身
以是揚名於後世大雅有言念爾祖述脩其德乃為美
聖訓昭昭十八章寫之琬琰千餘歲湯生本由義方教

石磨沙盪求成器其名延祖有意哉吾以子立為之字
立身之道將何如非曰凡人富與貴不賢而位何能為
蠅蟲豈不披紅紫周公亦人舜亦人口銜日月坐天際
勗哉見善勿遲疑往往後生誠可畏



盱江集卷三十五

欽定四庫全書

集部
盱江集卷三十六

詳校官庶吉士_臣李如筠

檢討_臣何思鈞覆勘

總校官進士_臣楊懋珩

校對官助教_臣羅萬選

謄錄貢生_臣郭坦

欽定四庫全書

盱江集卷三十六

宋 李覲 撰

近體

五言二韻

詠竹

外邊雖節目內裏卻空虛從來汗流浹只為寫經書

霜

夜落無人見朝看到處新非君有分別力不柰松筠

水

水性本來弱漸寒成此堅東風有時到幾日是殘年

鷺

逸少曾留翫人因喚右軍鳥名加爵號不離羽毛羣

鴨

庶人常用贄貴在不飛遷飽食待庖宰虛教兩翅全

惜才

醜婦易為潔愚兒多守純天將惡文采萬物恐無春

五言四韻

山舍寓止

無計奈踈拙走逃雲水隈
鶴飢雖厭夜龍睡却嫌雷
師友關千古窮通付一杯
商巖版築者底處有梯媒

東巖精舍

像設彼何時高僧白衲衣
水寒吞日氣樹老慣霜威
幡影捎天近鐘聲落谷微
可憐成道易無事即無機

閒夜

披衣坐小亭夜氣拂人清月暗先成暈蟲吟不識名舉
杯期混沌開卷賞莖英此興知誰會松風鶴睡驚

霧

光明人所好幽暗此何為樹在谿無影禽來鷓未知愛
花留潤與避日卷陰移底事偏相惱天涯欲望時

自詠

俗態共紛紛吾心誰與論幾因清夜夢還見古人魂聖
域寧無樂文家別有尊此身聊自足獨恐累兒孫

睡思

俗語不入耳旅愁還到心坐多渾易厭夢好欲重尋暴
雨撩蓬響殘陽過嶺陰迴看奔競苦此興貴南金

秋熱

江湖限南鄙秋令到還稀節換空看歷人閒未趁衣齊
紈方得意屢燕莫言歸祗有松筠徑風高暑氣微

鑑湖夜泛

以明月到樽
前為發句

明月到樽前拏舟古岸邊亂山斜入霧遠水倒垂天酒

氣薰龍戲歌聲弄鶴眠
迴頭嗤李郭此外更無仙

池亭小酌

得和字

客思都無著臨池一醉歌
喚春呈物象移性入天和
月影碎荆玉波紋緯蜀羅
相看盡仙骨俗態已無多

迴胡舜元賦稿

一把長篇讀驚嗟即過旬
誰知後來者還似老成人
古訓但時習英辭當日新
慙無稱薦力空此見天麟

迴黃通詩篇

老杜沒已久嗟哉吾子心時人任詬病獨自革浮淫美
玉寧須琢朱絃豈在音鍾期如未見慎勿等閒吟

送路極北遊

六月地欲赤驅車河朔行王師備戎狄游子念功名盡
識山川險深窮彼我情歸來具封奏直上請長纓

感事

太平無武備一動未能安廟筭何時勝人生到處難役
頻農力耗賦重女工寒祇有盱江守憐民不愛官

時國子慎

博士守
本郡

閒居

無物可勞情空郊日閉
扃雨吟春破碎貧飲客
凋零世事重江險才名
一夢醒同心祇松栢見
我尚青青

萍

盡日看流萍誰原造化
情可憐無用物偏解及
時生泥萍根萌淺風波
性質輕晚來堆岸曲猶
得護蛙鳴

送張駿嘏

人意皆懷土嗟君無故園欲行須盡室此去又他門靜
裏文章好貧來節行存振淹知有日倚伏豈虛言

村行

產業家家壞誅求歲歲新平時不為備執事彼何人朱
戶仍奢侈柴門轉窶貧若非衢室畔無用說悲辛

感懷寄擇之

衆人皆銳進唯我復幽居慮遠夢多亂身閒氣不舒干
求非祿位好尚豈詩書日夜又日夜霜寒鬢髮疎

雞

嗟爾羽蟲類昂然冠距
麓徒為識昏曉猶未免庖厨年
少苦令聞主人頻見呼寧思避弋者天外去鴻孤

堂西夜坐

炎蒸得避處鋪席對西牆
有月樹陰黑無風山氣涼
聚蚊妨袒裼飲井當壺觴
妻子詎知我笑言皆在傍

寄題陳適追養亭

築室先塋下哀心有所歸
每來開戶牖渾似戀庭闈
丘

木成風樹衰裳換綠衣吾生與君類東望涕交揮

送宜黃柳尉

荒郊人事絕歡喜見時髦舊業椽為筆新官草染袍幽
明終考績州縣豈徒勞況有松筠性凌寒節更高

送君俞

之子來相問吾言豈不誠文章難得理聲律易求名貧
甚須清節親安莫遠行異時如有立宗族亦知榮

送黃祕丞

天下為人子何人似慶門二親皆白首同日拜皇恩就
養蘭生畹娛賓酒滿樽自嗟偏侍早相送只銷魂

寄題廖說蒙亭

聖人雖在上君子有窮時自得山居樂何須世俗知夜
多松月分涼與水風期只恐亨通去清閒却付誰

晏起

貧士無所務閒眠常起遲謾勞難口喚不奈睡魔欺宿
酒猶薰腦朝飢未到脾誰能空汲汲肉食自謀惟

養疾

少小唯貪酒病來纔信醫問方逋客許尋藥野人疑夜
擣全聽慣寒煎覺沸遲古賢曾愛死此意亦誰知

遠山

最能牽病眼天際一山橫盡日是秋色無人知地名暗
時雲自合缺處路應平才子霑衣淚千秋共此情

送吳伯華

典學淡無味畏塗來幾程舉家應好事努力為求名馨

膳南陔遠連環昨夢驚壽觴何以薦經術抵金羸

次韻陳殿丞除夜感懷

浮世因循過流年次第新迴思舊來事都似夢中人不
飲偏嫌雪多愁却怕春星魁欲寅位五鼓莫頻頻

早歸

病馬不妨騎出門常便歸見人無事說是物與心違通
塞元關命驅馳轉覺非莫教塵裏汗壞卻篋中衣

晚聞角

傾耳斜陽裏無聊拭淚頻平生慣聞處今日自愁人夜
近歇不久風來聽得真胡茄更何物只此已傷神

庭樹

不是栽培力誰容此處生細聲饒客睡斜影與鄰清地
窄根猶迸秋遲葉未驚虞人雖欲伐卻怕損簷楹

哭女二首

妻死女已病踰年成二喪此生誰骨肉未識好衣裳看
面雖猶小聞言盡可傷最知憐祖母句句刮人腸

又

老樹枝葉薄先秋風雨過人間不善事身外想無多理
遣誠如幻悲來豈奈何從前短鬢髮為爾漸雙皤

贈端師

十載寓都城人傳善相名一言知禍福相識盡公卿洪
井舊鄉路紫衣歸計榮塵緣應漸了何日悟無生

寄題鄒氏延壽亭

一世躋仁壽君今更欲延山中想無事分外得長年松

老多經雪雲閒不到天區區殉名者回首倍淒然

感秋

徙倚重咨嗟非緣惜歲華關山異鄉客砧杵別人家天
冷雲含日谿清水獻沙屈魂終不返悲思更無涯

次韻答陳殿丞

不能隨薄俗非是向深山自喜道無屈所嗟心未閒酒
鄉貧更入詩債病猶還一字成虛美通宵只厚顏

讀趙氏淳化詩集

少年曾誦習誤認古人詩風雅世不重姓名誰得知高
情如隱者薄宦過明時地下尋才鬼應逢陸與皮

小女

惜汝今何恃言來淚滿襟死生雖分定襁褓累人心飢
買鄰家乳寒勞祖母針豈知泉路隔時撥總惟尋

送吳著

好學誠雖篤事親心不忘秋風滿黃葉歸路正重陽力
行宜無改脩辭況有方起家知可望蘭秀自聞香

題靈陽宮

費君投杖處行客過彷徨水面風雷散沙頭草木荒一
壺誰世界千古共淒涼大塊偏勞我燒丹未有方

龜峯精舍

去縣二十里路平時正春四山唯有石一寺更無塵融
結疑天意經營憶古人但知安樂處何必是金身

鳴蜩

雨餘雲漏日蟲思已喧喧時節驚初夏聲音似故園為

誰吟綠野相共送黃昏便是秋來信霜髯更幾根

送張評事

江上楚花鮮君行一黯然居官無藉手選部豈知賢
善雖由已亨通亦在天都人如問我疎嬾甚當年

送春

送爾歸天去天應解禍淫物生誰得所我見獨傷心

楚詞

有目極千里傷春心之句好景吟來徧芳樽醉不禁東風別無用百

草已成林

君賜以新詩相示因成四十字答之

君詩三十首一一敵琅玕語近終非俗情閒不似官姑
山蟠郡碧盱水蘸天寒景物將才思相期李杜壇

送李侍禁

三載盱江上軍和盜亦殲事煩終不倦貧極始知廉別
袖揮寒日歸舟載夜蟾懋功宜有賞天意在官占

寄周寺丞

我愛南豐宰天資舉措奇上官如不怒善政有誰知賦

役貧中減鞭笞惡處施邑人多未悟去後始應思

次韻閻判官除夜

密雪穿窻入孤燈向壁光老來人不覺夢斷酒猶香世
事休思慮年華任短長朽株難長育空此見春陽

送閻判官

鄉樹江淮接軍籌歲月深從公雖盡力當路少知音賦
命休重問離觴且滿斟君言鵬與鷁何者是飛沈

送彭昱應舉

計偕千百數太半是虛名近日逢吾子中心歎筆精衆
人皆祿位所貴在誠明努力唐虞際期於大有成

送黃銑應舉

先世宦不達少年才已雄何人為父執獨自振家風物
色營求廣賓興禮數隆孤寒今有望太守漢吳公

夏日郊園

三徑是生涯朋游日已賒野情饒皓鶴寒氣入甘瓜移
竹調風韻疏泉浴月華塵埃應附勢不肯到貧家

寄黃晞

長憶黃夫子才高行亦淳
世情輕近事見慣即常人
何力康時務將身役路塵
七閩山水國是處好安貧

送黃介夫

短亭車馬地送子一盤桓
不畏離羣久所嗟行路難
曉衣雲日薄撲面水風酸
聖有中庸訓時時著意看

送山甫

喜爾年將壯為儒志可嘉
鄉閭知行實場屋見辭華
公

道方無壅君門況不遐直應千里足世世出吾家

送沈郎中

偽飾久終變真誠老益純官為郎位貴家似舊時貧去
作吾民福歸尋楚水濱他年名粗立林下願相親

送江茂才

少小尚英奇高談與衆違久窮纔信命遠客合思歸簞
食非無樂京塵誤入衣雲山仍舊好况是觀庭闈

贈端上人

佛法本無二誰論律與禪水行到處八月出有時圓事
去何嘗念忙中不廢眠松堂白日永幡影自飄然

千福寺昧軒

何人指蒙昧題作此軒名天理自晝夜道心無晦明用
當羣物化舍去一毛輕磊磊山前寺時聞鐘磬聲

怡山長慶寺

行行金碧裏氣象恍如春不記來時路自嫌衣上塵院
香知有佛僧靜似無人十載京華夢相逢一欠巾

傅翼甘圃

老圃君何學中心切養親從來啜菽處便作采蘭人百
行當無愧三牲未足珍孝廉方察舉勉勉詎長貧

林屯田思軒

慮遠無如靜茲軒得地幽一官雖智效萬仞更心游風
月趨吟筆乾坤入坐籌延英期上對豈是為身謀

回明上人詩卷

學佛有餘力吟詩過一生情閒氣馘少句好琢磨成栢

竹門庭古冰霜筆硯清輸他飽食者終日自無營

聽周大師琴

已解琴中意更加絃上聲他人鄭衛雜此手鬼神驚深
夜衆籟息寒天孤月明四鄰應得睡濁酒且同傾

送覺師西游乞御書

累聖多材藝留神翰墨間皇墳非小道玉版徧藏山上
士持三學西行謁九關奎華如可捧歸伴白雲閒

送分司吳太博還鄉

休官衆未許分政且歸閩名係金閨彥身為蕙帳人林
泉新得主冠履漸無塵知足應常足安能更問津

送任大中

真偽少分別吁嗟此世情西施作老婢南郭逞新聲命
合生來困詩應沒後名旅游何所得赤日又徒行

送杜奉職

青紫皆同道稀曾到薜蘿感君非我輩無事每來過此
別當貧病何年共醉歌人生有後會爭奈鬢雙皤

送陽曲蔡尉

鳳皇貴在德孔翠豈無文詩禮多承訓賢能迥出羣談
清蛻塵滓志大躡烟雲更喜并州牧豪英天下聞

送武陵令

之子當為邑吾朝信擇人位卑難立事任重合憂民槃
瓠多遺種桃源即近鄰登臨如有見才思日應新

送酸棗鄧主簿

畿縣官雖小京華日可親文章成薄俗交結最難人曲

學應無廢存誠況已純邦工尋尺用杞梓詎沉淪

送仙遊知縣許延評

策名曾未幾奮迅出埃塵陋巷潛心久亨衢得意新君
恩方責報民業近多貧莫學悠悠者謀身不為人

送杜寺丞知永城

薦表同時入天衢自此通弦歌新邑宰清白舊家風官
舍隋河北離觴華谷東勗哉松柏操咫尺是堯聰

回廖解元所業

昔者聞鄉舉良田恐甚蕪于今觀日益珍樹已垂珠衆
惡吾雖察謙卑孰敢踰聖賢明訓在只此是亨衢

送張寺丞

三載居鄰縣得聞金玉音路遙相見少道合受知深已
矣瓜時成悠哉魏闕心歸舟望不及白日隱寒林

送何秘丞

吳人作蜀官萬里汴驚湍地俗雖云異民情想一般智
明終戒察政惠不須寬前史多循吏乘閒更熟看

送劍州張掾

名在鄉書久，恩由父任優。
從今紹清白，即此是箕裘。
交結多良士，經過半舊游。
舉知應有望，鴻翼佇橫秋。

送演教大師東遊

野客相知久，年來髮漸華。
衣冠從異教，言行似儒家。
通塞隨天命，遨遊徧海涯。
武夷應有會，好去醉流霞。

寄贈福山長老

時世重因循，師何獨苦辛。
潔齋徒衆散，剛直里閭嗔。
游

藝能濟物舊交多雅人雲山雖好住住久轉勞神

五言六韻

書樓夏晚

地僻無他管樓危有剌涼遠流通越派殘日共秦光鳥
道頑雲黑人家病葉黃高情夢箕願閒景畫瀟湘山藥
香多桂漁歌濁少商太平知可喜何者是簪裳

小杉

小杉高丈餘體直立還孤任過千年雪應無一節枯鬼

狂從髮解龍長怕鱗
麓怪狀春寧笑清聲
月所娛地終存古氣
景合在仙圖不作明
堂用良工莫厚誣

乾元節羣臣祝壽小人無位以詩繼之

帝命當敷佑民生有
厥初千秋唐節日萬
國禹朝車韶美笙鏞
外需亨飲食餘神仙
似姑射夢想即華胥
嘉會誠難得愚忠敢
自疎古人誰最壽無
逸在周書

悶書

行行四月晦絺綌未
能裁天氣疑無定春
寒恐再來襲

衣從汗浹交扇取風回野秀深成黑鑪薰冷作媒年高
情已淡俗薄意多猜李杜今何在芳樽誰與開

同徐殿丞遊麻姑山陳屯田聞之以詩見寄次

韻第一首

良友嗟塵網相期物外遊求珠非赤水不死是丹丘机
上麟交擬樽中蟻亂浮仙家一度醉人世幾千秋藥氣
多留鼎茶香細出甌堯人方曠蕩容易學巢由

五言八韻

送李著作知柳州

到官十五月太半在他邦
惠術未施一公心無與雙
剖符新使粵畫室始浮江
地理將分嶺行程即下瀧
旅愁侵酒座秋色漏船窓
屬吏誰非懾羣蠻不易降
人稀財豈厚俗異性多憊
自此觀賢業洪鐘且試撞

五言十韻

送知縣蘇秘丞移英州

大邑曰南城唯君治道行
何曾設鉤距到底是聰明
鼎

在神姦伏鷹來鳥雀驚詐窮多自笈刑重亦知平府史
如廉士農桑學頌聲在官嗟不久丕績已垂成嶺路當
過庾州圖喜得英遠人天與韋弊俗日將清遊刃非無
地搏風別有程上心應寤寐彝器待書名

夏日雨中

一雨遂不止我行當此窮蜀東天亦漏堯後水猶洪大
點有片重密濛無寸空曉唯壺箭覺暖似炭爐通書筆
提梅洗征衣擘潤烘簾間稀去燕枕下即鳴蟲竹粉千

腰白桃皮半頰紅
物華嬌自銜天意
猛相攻酒退愁城
外吟興憤涌中遣
誰咨畢宿留作旱
時功

七言二韻

鄉思

人言落日是天涯
望極天涯不見家
已恨碧山相阻隔
碧山還被暮雲遮

少年

新翻曲調恐人傳
不許高聲唱玳筵
金獸也嫌春態淺

向風噴作綠楊烟

自勉

月欲東生日又西莫隨兒女醉明時黃泉一向埋愚鬼
不與人間史筆知

戲題玉臺集

江右君臣筆力雄一言宮體便移風始知姬旦無才思
祇把幽詩詠女功

讀皮襲美病中書事詩有可憐真宰意偏解困

吾曹之句偶代答之

刺虎屠龍古有名事於難處迭相矜
要知真宰爭功意
困得英雄始是能

雪中見梅花二首

品物由來貌取難共言花卉易凋殘
寧知始射冰肌侶
也學松筠耐歲寒

數枝斜出短牆陰
密雪無端苦見侵
天意似憐羣木妬
盡教枯朽作瑶林

和慎使君出城見梅花

化工呈巧異尋常
鏤月裁雲費刃芒
莫恠使君曾立馬
染衣渾似有天香

雪中贈柳枝

暖氣來時柳眼新
一場冰雪更愁人
要知真宰無誠信
取次東風未是春

柳枝答

春早寒餘豈足哀
平生多難愧非材
去年二月都城裏

曾共花房帶雪來

慶歷二年二月五日京師大雪

和天慶觀瑞香花

聞說仙花玉染紅
別留春色在壺中
瑤臺若見飛瓊面
不與人間夢寐同

烏鵲

烏鵲翩翩競羽毛
南飛無樹過良宵
就中管得他人事
祇與天孫倩作橋

方平

五百餘年別恨多東征重得見青娥
擗麟始擬窮歡樂
不奈閒人背癢何

壁月

壁月迢迢出暮山素娥心事問應難
世間最解悲圓缺
祇有方諸淚不乾

睡起

簾卷鱗紋帳繫紗六龍西降樹陰斜
祇應夢裏成胡蝶
猶記南園數種花

讀長恨辭二首

玉輦迢迢別紫臺
繫環衣畔忽興哀
臨卽謾道蓬山好
爭奈人間有馬嵬

蜀道如天夜雨淫
亂鈴聲裏倍霑襟
當時更有軍中死
自是君王不動心

昇妻

有窮兵死為游畋
惆悵佳人獨上仙
試問單棲與同穴
可能雲漢勝重泉

梁帝

凝旒南面總虛名
廟祀何曾暫割牲
但學禪心能忍辱
莫羞侯景陷臺城

鞦韆二首

華郭春光欲暮時
綵繩爭蹴夜忘歸
佳人不道羅紈重
擬共楊花苦鬪飛

風靜高標埋暗霧
月明孤影落澄波
狂心擬逐游童上
無奈春醪足困何

嘲漢武

甲帳居神本妄言露盤猶在國東遷欲知千載金人淚
為恥君王不得仙

戚夫人

百子池頭一曲春君恩和淚落埃塵當時應恨秦皇帝
不殺南山皓首人

有感

官家的的要寬征古時什一今更輕州縣酷嫌民漸富

幾多率斂是無名

白刃劫君君勿言人生禍難俱由天君家歲計能多少
未了官軍一飯錢

庭下縲囚何忿爭刀筆少年初醉醒黃金滿把未回眼
笑殺迂儒欲措刑

自遣

富貴浮雲畢竟空大都仁義最無窮一千八百周時國
誰及顏回陋巷中

睡思

睡魔氣勢重千鈞壓倒心閒食飽人莫笑坐間常似醉
當年滿腹是精神

遊寺醉歸却寄同坐

江村古寺偶閒行一飲全疑酒有靈水底屈原應大笑
我今獨醉衆人醒

索酒

不醉多愁醉多病幾回愛酒又停杯死生若是有天命

莫放愁來任病來

憶錢塘江

昔年乘醉舉歸帆
隱隱前山日半銜
好是滿江涵返照
水仙齊著淡紅衫

謝傳神平上人

最陋徒煩妙筆傳
呼兒看了獨淒然
丹青不解隨人老
相似都來得幾年

次韻答提刑孫都官

二首

病樹難隨萬木榮
閉門終日自愁縈
繡衣使者知何取
肯向民間問死生

真賞由來世上稀
幾人相見不相知
如今一字成華袞
豈識龍章與鳳姿

謝知縣徐殿丞示及新詩

當時子賤好援琴
千載誰傳治世音
珍重南城多暇日
盡將風化入清吟

送流人

人情自古怕遷移更去南方路險巇從此異鄉誰是侶
只應明月解相隨

送周山人

鬼事無形尚可疑人倫有驗衆皆知武夷山路幾百里
歸去西風落葉時

遣興

境入東南處處清不因辭客不傳名屈平豈要江山助
卻是江山遇屈平

詠桃

方朔相逢阿母家
別來幾度換年華
春風合是教伊笑
開盡無名草木花

閏正月三日偶書

二首

一步寒郊一慘眉
望春春色苦來遲
東君未必私桃李
只恐梅花謝有時

無賴年年逐酒徒
今年不飲興何如
醉鄉若有人名籍
但願春風點檢疎

論文 二首

今人往往號能文意熟辭陳未足云若見江魚須慟哭
腹中曾有屈原墳

天寶年中事事新長安還有謫仙人騎鯨去後無尋處
輸與勾芒自管春

送僧遊廬山

行非為客住非家此去廬山況不遐要見南朝舊人物
池中唯有白蓮花

李郭

元禮禍成鉤黨後林宗身免閉門時死非不智生非怯
同室鄉鄰各有宜

戲題荷花

昔人詩筆說蓮花不嫁春風早可嗟今日倚欄添懊惱
池臺多是屬僧家

戲贈月

夢中識路亦何為

古詩有夢中不識路之句恰要逢人已自迷一月

解行天一匝嫦娥猶未免單棲

葛陂懷古

按費長房傳葛陂當在汝南
今信州弋陽有之未明其故

長房化去已千年鬼魅紛紛不畏天
老鼈若來為太守
何人殺向葛陂邊

七夕 二首

無奈家家乞巧何豈知天上拙人多
喚他烏鵲辛勤殺
纔得扶舁渡淺河

一年一度暫和諧幽閑生心亦可猜
莫道乘槎無徑路

支機曾屬客星來

宗人宅折桂堂

從來皎月印長空
桂樹遙看影在中
好問素娥多折取
莫教閒占水晶宮

麻源題壁

一到麻源日又曛
幾回欲起卻逡巡
世間豈是無山水
不奈閒人好聒人

馬嵬驛

六軍剛要罪楊妃空使君王血淚垂何事國忠誅死後
不將林甫更鞭尸

齊世家

莫以荒淫便責君大都危亂為無臣若教管仲身長在
何患夫人更六人

漢宮

哀平外立國權分只為當時之嗣君試問莽新誰佐命
最應飛燕是元勲

景陽宮井

以色從人自古然
幸逢聖主得稱賢
太王姜女來岐下
應不相將墮井泉

燕雀

燕子從來巧語聲
主人相愛是常情
黃頭老雀何能解
飽食官倉過一生

繡戶珠簾見最頻
暖來寒去但安身
翟公門下時飛入
全勝交情斗頓人

張禹

漢室尊儒未得真只求學藝不知人君王幸已疑王氏
苦把春秋助賊臣

孔光

王莽欲為先與草董賢將過自迎門省中樹木何閒事
却對妻孥不肯言

元紀二首

孝宣應是不知書便謂先王似豎儒若使周家純任德

親如管蔡忍行誅

君道乾剛豈易柔
謬牽文義致優游
高皇馬上辛勤得
總被儒生斷送休

聞鶯

纔轉歌喉碧樹枝
驚飛還避巧丸兒
可憐蜂蝶無言語
入徧花房人未知

學北堂有海棠一株
顏色至佳凋落稍速
憶而

為詩

來時初見滿枝紅
壁碎珠沉幾日中
宋玉有鄰誠耐事
三年猶在短牆東

玉胡蝶花

胡蝶生來只愛花
春工描樣作奇葩
莊周有夢何曾覺
冰雪肌膚落幾家

次韻答陳殿丞南塘觀魚見寄

鱗鬣摧殘幾許年
水平風靜得潛淵
喜無美味登君俎
且學驪龍盡日眠

陳丞以魚在深淵借喻鄙薄故有是答

送傅野

國學先生石與孫金鈴木舌士林間欲將天下觀諸掌
之子從今上泰山

送杜萬

谷口生涯已是貧素衣還擬冒京塵因風早寄登科信
裝點江南幾日春

儒行

一死相從患難時何人能與古人齊
鄴生泉下還知否

賣友而今價轉低

感義

懊惱常人只好儒
古來忠義出屠沽
試將朱亥相倫擬
幾箇衣冠是丈夫

屈原

秋來張翰偶思鱸
滿筵鮮紅食有餘
何事靈均不知退
却將閒肉付江魚

宋玉

世間佳麗每專房一顧多應萬事荒
夢裏若無真實處不妨頻為賦高唐

贈日者鄒生

賢不必通愚不窮悠悠無處問蒼穹
可憐富貴君之柄斷在山人指掌中

送夏旦赴舉

嶺梅初盡草初生馬上春風酒易醒
好共大鵬雙奮擊此行有路到南溟

送春

宜春臺上送春歸
淚滴金杯不自知
懊惱黃鸝解言語
飛來唯見落花枝

曉角

腸斷城頭畫角聲
燈青月黑酒微醒
濃香夢裏誰曾管
只有離人夜夜聽

送丁正臣

鉛槧辛勤四十年
搏風不上鬢霜寒
朱門何處是知己

短褐空瓢行路難

惜才

子雲辭賦似相如自說雕蟲異壯夫何事犬羊誇質素
患他人愛著貂狐

登越山

臘後梅花破碎香望中情地轉淒涼遊山只道尋高處
高處何曾見故鄉

送古山人

喜聞吉事怕聞凶天下人心處處同
乍出山來言語拙
莫將刺字謁王公

送毘師西遊

望望王城十二門
青山行盡入紅塵
近來富貴皆天與
到處應多問命人

送春寄呈祖袁州二首

去年春盡在宜春
醉送東風淚滿巾
今日春歸倍惆悵
相逢不是去年人

東君此去幾時來雪裏梅根待暖回莫似仙家寥落甚
蟠桃千歲始重開

酬陳屯田途中所寄

封豕長蛇戰嶺南何人肉食不懷慙只今唯有高眠好
風弄松聲水澣庵

正月二十日俗號天穿日以煎餅置屋上謂之
補天感而為詩

媧皇沒後幾多年夏伏冬愆任自然只有人間閒婦女

一枚煎餅補天穿

送薛經

多能未必有相知
況是東南義士稀
京洛路長何日到
風塵依舊化人衣

僧志月碧雲軒改為景雲軒因書

二首

長見江淹雜體詩
碧雲非是惠休詞
試言日暮佳人怨
何事高僧卻得知

景雲持律冠當年
遺迹雖沈古寺存
釋子若能精進去

便應題作景雲軒

書景雲軒壁

二江斜入似娥眉
盡日凭高把酒卮
貧賤別應無好處
猛忙中是我閒時

因遊華子崗題麻源壁

平生猶未識紅泉
今日纔遊石磴邊
宿雨半晴秋草濕
困來無處可閒眠

盱江集卷三十六